

黑  
龍  
江  
述  
略

黑龍江述略序

中國山川莫尊於遼東自阿爾泰山一支萬折旁薄而  
來爲外興安嶺敖嫩河出其南雷勒納障其西包絡喀  
爾喀部踰望所見俄羅斯界奔湊縈會俛乎中原剛氣  
必宣鬱不遽洩至黑龍江盡海而止蓋昆侖北幹極於  
艮維成終成始勢蓄未已天地所設嶮王公所慎固華  
戎所界絕而綢繆也黑龍江行省創置於康熙二十一年  
年經營大定於二十八年而重訂界約於咸豐十一年  
其間旗屯游牧一切措注細大之事官私著述蹟矣備  
矣獨自咸豐訂界以來邊防之務日益重交際之道日

益煩桐城徐君宗亮有感乎是橐筆所至奮讀官中書  
近據見聞所及爲黑龍江述略六卷舉凡疆域建置職  
官貢賦兵防叢事靡不臆理而甄錄之引古籌今不隨  
不激譁矣哉此經世實用之書也夫樹國必務本本立  
則勢張天地之氣萃於邊徼陰陽摩盪變動光明運際  
所極有開必先則地利視人事爲轉移可知也方今漠  
外沙磧縱橫萬部鎮將如此其相望戍卒如此其多臺  
站如此其密殊鄰之人近接戶闔金瑤之氣溢於絕境  
躡躡介乎屈強之間射景而刺飛抵隙而思逞獨恃萬  
潼億毳爲當關之寄卡倫鄂博爲金城之固蹈常狃習

塗人耳目不知變通以盡其利豈所以淳息時會而劑  
大烈於無外哉是書於分界之得失兵屯之緩急廿政  
之實耗以及設官初制之未善分旗積習之難移悼心  
失圖若茹大梗不殫反復推論以究其利病可謂極志  
士之情鬱已古今雄偉非常之端往往勦於書生憂患  
之所得龔氏自珍議西域置行省於道光朝而卒大設  
施於今日則君之蓄將必有所試予獨偉君五十之年  
身行絕塞屹屹著書仁閔憂世之心惻然滿抱談笑精  
悍無復當時相從爲文士之習海內不詫君狂矣光緒  
十六年孟秋之月合肥李鴻章序

黑龍江述略目錄

桐城徐宗亮晦甫

卷一

疆域

卷二

建置

卷三

職官

卷四

貢賦

卷五

兵防

卷六

叢錄

黑龍江省經制事宜見官書者舊附

盛京通志而私家紀述則有方式濟氏龍沙紀略  
西清氏黑龍江外紀至何秋濤氏朔方備乘攷訂  
北徼形勢於黑龍江山河阨塞尤詳實矣近自中  
俄重訂界約三十餘年邊防日以重要宜有專書  
備具今昔因革損益之故庶治國聞者得所擇焉

不徒備書其間輒據耳目所親分類輯錄凡六卷  
語曰利不什不變法又曰上策莫如自治竊本斯  
義附注鄙見挾私逞妄之習矢弗敢蹈知言者其  
鑒諸光緒十有五年夏四月宗亮自識

黑龍江述略卷一

疆域

黑龍江省在京師東北三千三百餘里東以黑龍松花  
兩江匯流處爲界與吉林省屬畢占河接西以克魯倫  
河哈瑪爾山爲界與蒙古車臣罕部屬接南以松花江  
爲界與吉林省屬伯都訥接北以外興安嶺脊爲界與  
俄羅斯國屬接東南以松花江爲界與吉林省屬三姓  
接東北以外興安嶺脊爲界與吉林省屬哈達伍勒河  
接西南以雅勒河口爲界與蒙古科爾沁札賚特部屬  
接西北以安巴格爾必齊河及額爾古訥河爲界與俄



羅斯國屬接計東至西三千一百餘里南至北亦三千一百餘里東南至西北三千七百餘里東北至西南亦三千七百餘里咸豐十年中俄改訂界約東以黑龍松花兩江匯流處黑河口爲界北以黑龍江中分右岸爲界東北亦以黑龍江中分右岸爲界其左岸自西北安巴格爾必齊河至東吉林屬畢占河原界三千七百餘里統歸俄屬而自北外興安嶺脊至南吉林屬伯都訥原界三千一百餘里亦僅一千三百餘里

按黑龍江省以水爲名古肅慎氏遺墟後魏時有黑水部屬勿吉遼時始專其號見史道宗本紀金

元以後部落散屬或羈縻臣之不列版圖我

太祖高皇帝征尼堪外蘭於鄂勒歡城在今齊齊哈爾城西南三十餘里實始用兵自是起天命訖順治歲遣兵將出征凡歷

三朝二十八年黑龍江諸部次第服貢分旗游牧全境乃定時諸部有名者索倫部薩哈連部卦爾察部薩哈勒察部呼爾哈部各部附屬又有屯城路諸名而惟索倫達呼爾兩部據地爲大並以驍勇聞焉黑龍江全境既定始與俄羅斯國接界順治九年以後俄人歲嘗入境侵犯時目爲羅刹出

師攻討未臻平定旋據尼布楚雅克薩二城益肆  
殺掠康熙二十一年

聖祖仁皇帝乃大遣水陸諸軍至黑龍江呼馬爾  
等處防勦與雅克薩城對壘並分路築城設站造  
船建倉以資屯運駐守隨有斬獲降附而將軍副  
都統官因以設立至二十五年遣荷蘭國貿易人  
持書往諭俄羅斯國主報書謝罪始議分界立約  
以永和好二十八年內大臣索額圖公與俄羅斯  
使臣費要多羅定議於尼布楚城遂以滿漢蒙古  
及俄羅斯喇地諸五體字刊界碑於安巴格爾必

齊河額爾古訥河等處其界約二則一將由北流入黑龍江之綽爾諾卽烏倫穆河相近格爾必齊河爲界循此河上流不毛之地有石大興安嶺以至於海凡嶺南一帶流入黑龍江之溪河盡屬我界其嶺以北一帶之溪河盡屬俄羅斯國界一將流入黑龍江之額爾古訥河爲界河之南岸盡屬於中國河之北岸盡屬於俄羅斯其南岸之眉勒爾喀河口所有俄羅斯房舍遷移北岸云云先是索額圖公奏言查俄羅斯所據尼布楚城係我茂明安部游牧之所雅克薩城係我達呼爾總管倍

勒爾故墟原非羅刹所有亦非兩界隙地也況黑龍江最爲扼要未可輕忽視之由黑龍江而下可至松花江由松花江而下可至嫩江南行可通庫爾翰江及烏拉甯古塔錫伯科爾沁索倫達呼爾諸處若向黑龍江口可達於海又恆滾牛滿等江及淨溪里江口俱合流於黑龍江環江左右均係我屬俄倫春奇勒爾畢喇爾等民人及赫真費雅喀所居之地不盡取之終不獲安臣以爲尼布楚雅克薩黑龍江上下及通此江之一河一溪皆屬我地不可棄之於俄羅斯又我之迷人悉應索還

如一一遵行與之畫界貿易否則不與彼和矣嗣  
奉

諭旨以尼布楚城爲兩國貿易之所左岸以安巴  
格爾必齊河爲界右岸以額爾古訥河爲界而雅  
克薩城仍歸我境焉雍正五年申明定例云烏特  
河等處地方暫置爲兩邊公中地方均不得侵佔  
居住俄羅斯國亦報如約咸豐八年內省髮捻寇  
起英人復滋擾廣東俄羅斯國忽起分界之議黑  
龍江將軍奕山公奉

旨與俄使木哩斐岳幅會勘定約四月五日奕山

公至黑龍江城十日木哩斐岳幅赴議十五日議定界約大概隨奏陳辦理情形其略曰俄使木哩斐岳幅至黑龍江城與臣會晤隨帶通事以清語傳說前因防範英夷由黑龍江往來行駛左岸蓋房存居今年續有數百人船前來屯兵助防英夷於我兩國均有裨益黑龍江一帶本係俄國地方現在江左存居滿洲屯戶均應遷移江右彼此互免猜嫌如有需費俄國供給至兩國界址自河北奈嶺迤東至額爾古訥河入黑龍江烏蘇里江松花江至海凡沿河各岸一半可屬中國一半可屬

俄國江內只准我兩國人行船他國船不准往來  
再俄國已經咨行中國理藩院嗣後各海口處應  
一體通商各派官員照管黑龍江城亦照此辦理  
我二人均係將軍之職各奉主命會辦分界之事  
即可定准對換印文兩國安靜各守各界等語臣  
答以中國與俄國分界以格爾必齊河興安嶺爲  
限遵行二百餘年並無更改今若照爾等所議斷  
難遷就允准至通商一節黑龍江並無出產且民  
情凶悍易生嫌隙爾等宜即將人眾撤回以全和  
好該使乃指畫自帶輿圖爭執不休至暮未定約



以明日寫字前來而去次日該使帶清字俄文到城面遞詳加詳看更屬荒謬臣比卽面還不收而去旋派員送回復令通事到城面遞並稱兩國和好今將黑龍江左岸北自精奇里河南至霍勒莫爾津屯其中原居滿洲屯戶仍令照舊永遠安居其餘空曠地方均與俄國爲界以便屯兵防範英夷通商一事仍照海口等處章程辦理各派人員照料其額爾古訥河黑龍江烏蘇里江松花江至海凡沿岸一半屬中國一半屬俄國爲界江中只准我兩國人船行走不准他國往來等語臣伏思

疊奉

諭旨均以不敢邊衅爲要而俄人頻歲由江往來起屋屯兵多備糧械又聲言夏閒加派兵將續來以防英夷意殊叵測現在內省賊氛未靖軍餉支絀吉林黑龍江兩省兵丁出征未回礙難輕啟兵端再四思維與其張皇於事後莫若慎籌於事前查所議請黑龍江左岸舊居屯戶之外空曠地方給與存居及江中准其行船均與我屯丁耕作生計無妨暫遂其欲庶可免生枝節其河比奈嶺額爾古訥河等處本係原界無庸另議通商之事則

凡海口地方均經照准黑龍江自可一體辦理以  
免滋擾惟該使文內以河爲界字樣應宜刪改而  
烏蘇里江松花江等處皆屬吉林地界應由吉林  
將軍核辦比卽備文前赴該使相商回報明日入  
城續議次日該使仍帶清字俄文到城而遞以河  
爲界四字載明未改臣比卽正言駁議該使大怒  
收文而去通事留言明日備文再商是夜左岸燧  
聲不絕陸屯水船號火極明屯戶男女環赴黑龍  
江城副都統衙門泣求保護臣一面派員密撫屯  
戶毋稍驚擾致生事端一面派員前赴該使權以

尚好爲詞藉偵虛實該使當令通事傳說我與將軍會晤數次所議界址條款多不允准專以奏明酌定藉詞推脫現今俄人在吉林闖吞奇集等處屯居有年將軍豈不知之彼處有俄兵保護英人不敢來擾且兩國議界前已咨行理藩院並未駁回左岸滿洲屯戶我能主掌不令遷徙將軍既奉命分界豈難立予定奪今既前來問好尙有和睦之意明日我令通事寫字前往將軍若照字辦理卽對換畫押文字彼此爲憑如其不然我先將左岸滿洲屯戶遣兵驅逐不准存居等語次日通事

帶清字俄文到城臣詳閱一過已將江左屯戶居處讓出開寫此外本係空曠地面現無居人較前甚爲簡明該使前後舉動詭譎異常無非爲圖佔江左起見若不從權酌辦徑執舊例分界爲言兵燹立起實不知如何結局於東三省邊疆大有關係不揣冒昧照給畫押文字以紓眉急嗣奉

諭旨從權辦理勢非得已所請通商之事卽著奕山體察情形妥籌條約其界約一則一黑龍江松花江左岸由額爾古訥河至松花江海口作爲俄羅斯國所屬之地右岸順江流至烏蘇里江作爲

大清國所屬之地由烏蘇里江往彼至海所有之地如同接連兩國交界明定之閒地方作爲兩國共管之地由黑龍江松花江烏蘇里河此後只准中國俄國行船各別外國船隻不准由此江河行走黑龍江左岸由精奇里河以南至豁爾莫勒津屯原住之滿洲人等照舊准其各在所住屯中永遠居住仍著滿洲國大臣官員管理俄羅斯人等和好不得侵犯云云咸豐十一年中俄大臣會同查勘以中俄文分立界碑如約

黑龍江省今在齊齊哈爾城西南距奉天省一千八百

餘里東距吉林省一千四百餘里由京師出關凡三道  
一由奉天省歷吉林省屬長春等處爲東道俗稱御路  
一由奉天省出法庫門歷蒙古草地爲北道一由奉天  
省出法庫門歷吉林省屬伯都訥等處爲中道東道則  
官司奉公馳驛者由之北中二道則仕商因時取徑者  
由之省城西至呼倫貝爾城八百四十里凡十七台西  
北至布特哈城三百四十里南至茂興站四百五十里  
接吉林省屬伯都訥界凡八站又東南至呼蘭城三百  
七十七里凡六台又南至呼蘭廳城一百五十里凡二  
台又北至綏化廳城二百二十里北至墨爾根城四百

五十里凡六站又北至黑龍江城二百二十四里凡四  
站又北至大黑河屯七十里接俄羅斯國屬左岸界東  
北至興安城五百八十里咸豐十一年以前號全省六  
城其興安城呼蘭廳城綏化廳城皆同治光緒年間陸  
續增設

按黑龍江省南境寬坦無山自奉天出法庫門後  
日行平阜漸起漸高無俯瞰低下勢風沙閒起亦  
不至如西域大漠惟三四月閒積雪春融水潦縱  
橫處處有哈湯閒之六七月江漲時亦然商民於  
此兩時輒止不行其諸城往來道路一依台站而



取徑便捷亦多有之以東往吉林省屬爲最地名里數頗叢雜難考至赴京師一路有由蒙古草地轉至喜峯口入關者視由奉天徑三分之一材官遞急奏去來不及一月往往以此邀賞西北諸路則距省百里以外峯巒稠疊溪澗縱橫竟日或不逢一人穿樹覷林而過至內興安嶺迤西蒼鬱尤甚松柞蔽天午不見日風景絕佳聞有石洞天然几榻足供行人憩息焉

黑龍江省與吉林省屬接者曰伯都訥城曰雙城堡城曰阿勒楚喀城曰三姓城皆在南界乾隆二十七年吉

林將軍奏稱三姓西至阿勒楚喀地勢闊遠文書往來  
未便請在呼蘭屬巴彥蘇蘇以東借城設站五五十三  
年又奏稱三姓地方偏仄控制失宜請在呼蘭屬固木  
訥古城西至色阿里哈達設封堆十二南歸三姓北歸  
呼蘭皆今呼蘭三城屬地曰黑河口在東界與蒙古部  
屬接者曰郭爾羅斯曰杜爾伯特曰札賚特曰科爾沁  
曰烏珠稜沁曰喀爾喀車臣罕皆在西南界與俄羅斯  
國屬接者曰黑河口呼蘭城境與吉林省屬接在東北  
界曰黑龍江城境在北界曰額爾古訥河呼倫  
貝爾城境在西北界其江左俄羅斯國屬界內原住滿

州旗戶四十三屯東以精奇里河口橫至格爾沁河爲界西以黑龍江岸爲界南以斜對右岸霍勒莫爾津屯爲界北以精奇里河口爲界

按咸豐八年以前中俄大界以外興安嶺脊爲斷而互市於尼布楚城則在額爾古訥河之北安巴格爾必齊河之西故五體字界碑兩河同時刊立其時防俄越境重在呼倫貝爾一路今分黑龍江左右岸爲界則中流輪船既自任便游行而兩岸自西至東三千餘里又皆處處徑通僅黑龍江城臨江而治號爲重鎮面直海蘭泡俄城以當前衝

背倚內興安嶺以爲後應然上游自額爾古訥河  
東渡繞呼倫貝爾布特哈兩城境踰嶺而前徑由  
墨爾根以達省城則黑龍江城已遠在內興安嶺  
之外下游由江至海在吉林省屬境者自烏蘇里  
河至興凱湖以烏蘇里及松阿察二河作爲兩國  
交界其二河之地東屬俄境西屬中境又自松阿  
察河之源兩河交界踰興凱湖直至白陵河再自  
白陵河順山嶺至瑚布圖河口再自瑚布圖河口  
順琿春河及海中閒嶺至圖們江口之地東屬俄  
境西屬中境於是黑龍江吉林兩省均無師船出

海之口界約所稱江內只准兩國行船一語蓋同  
虛設而俄於伯里地方設立權關有將軍經理輪  
舶往來以通朝鮮而達南洋雖水道迂迴取捷莫  
由然水陸五千里一氣灌輸固無南北中梗之患  
矣至左岸原住滿洲旗戶四至各界未載明約縱  
橫計之不過三百餘里號段山屯光緒紀元而後  
俄以固畢爾那托爾文武二員駐海蘭泡城隸東  
悉畢爾省總督設屯置戍沿江上下聲勢聯絡而  
旗戶屯地孤懸其中遂有興屯佔壑設電安卡情  
事曉夜不安控訴莫理近經將軍恭鏗公咨商總

理各國事務衙門派員過江詰問迄無成議識者以爲旗屯錯雜俄境終歸蠶食右岸曠地甚多及時移徙以安部眾免與俄國藉端生衅實屬兩全之計是在通籌邊防者審之

齊齊哈爾省城東南皆平漠無山西接蒙古科爾沁扎賚特界百四十里亦無山惟北近墨爾根界百里卽山皆內興安嶺之分支也呼蘭城東境有青山黑山與吉林省屬賓州等處接界舊爲布特哈捕貂之所布特哈城在諾尼江西西北皆山呼倫貝爾城接蒙古喀爾喀車臣罕界環呼倫貝爾二湖皆山黑龍江城本居興安

內外二嶺之間外興安嶺山脈自鄂倫河源肯特山北  
分支東行繞黑龍江之北今皆屬俄其內興安嶺則自  
肯特山南分支東行至額爾古訥河入境繞黑龍江之  
南興安城跨嶺而居墨爾根城相近而南皆在山陽

按內興安嶺西起喀爾喀車臣罕境東訖黑河口  
境重岡疊阜皆此一嶺之所聯綴其間支溪曲河  
以百十計而諾尼江發源於此號爲巨川凡踰嶺  
而行北以墨爾根城台站爲正道至黑龍江城西  
以布特哈城卡倫爲正道至額爾古訥河餘則叢  
林密菁中陷淤泥皆人跡所罕到光緒年開墾設

卡倫防護漠河金廠始有開路徑山之議嗣經督辦礦務道員李金鏞親往履勘深以工費勞鉅暫緩興役然由齊齊哈爾城繞至漠河幾三千里若由布特哈卡倫首路開山取徑則程路幾少其半以邊防論亦開道設險之一奇也

黑龍江爲北徼大水源出蒙古喀爾喀車臣罕境入俄羅斯國界歷一千七百餘里至安巴格爾必齊河及額爾古訥河等處始入省界其閒名川匯流入江及附江河以入小水凡數百下至黑河口入吉林省境與松花江烏蘇里江會爲混同江以注於海咸豐八年中俄分



江而後左岸所匯諸水曰安巴格爾必齊河

卽康熙年  
原立界碑

處

曰卓魯克齊河曰烏魯穆河曰格爾必齊河曰鄂爾

河曰鄂爾多昆河曰烏爾蘇河曰波羅穆達河曰額爾

格河曰巴爾坦河曰淘斯河曰庫倫河曰額蘇里河曰

精奇里河曰謨里爾克河曰博屯河曰卓倫奇河曰哈

拉河曰庫爾圖爾河曰庫木努河曰庫魯河曰蘇魯河

曰畢占河皆歸俄境右岸所匯諸水則自額爾古訥河

卽康熙年原立

而下曰墨河

卽漠河今  
開辦礦局曰額穆爾河曰

旁烏河曰瑚瑪爾河曰滾河曰伊什河曰肯河曰坤河

曰科里河曰遜河曰科爾芬河曰烏伊河曰佳里河曰

福河曰札伊河曰梟達河至黑河接吉林省屬境大率源出內興安嶺諸山之陰而以額爾古訥河爲鉅

按黑龍江水勢深闊舟楫雖通商賈不復往來康熙初年羅刹之役由吉林造船前往後遂立爲經制水師乾隆二十二年俄人呈稱東北邊界被災遣船運糧必由東路請假黑龍江地方行走

詔飭理藩院駁回不行今俄人以輪舶往來幾十年矣然地處極寒八九月閒江卽結冰歷日旣壯厚過等身至次年三月始漸開泮又近山無煤可采輪舶皆用木薪煙筒圓徑倍於行海每十數里

閒輒預存木薪岸上以備停取故竟日行駛不過  
二百里而止其由江入海則於伯里地方別易海  
舶乘之自漠河設卡由黑龍江城西行右岸一千  
六百餘里荒落無人班兵上下及糧械轉運悉資  
俄輪賃值不訾卽江冰而後亦借行左岸俄以牛  
馬駕耙犁供載至漠河口多則十一二日中途宿  
食皆有頓置每一耙犁載重六百斤值銀十六兩  
云

諾尼江古腦溫江今名嫩江源出內興安嶺山陽之宜  
呼爾山自北而南循墨爾根城齊齊哈爾城外歷一

千四百餘里與吉林省屬松花江會復東行循黑河口入黑龍江凡呼蘭城糧運舟行由呼蘭河西過吉林省屬雙城堡伯都訥各境而北入諾尼江以至墨爾根城爲止歲以爲常呼蘭河屬呼蘭城境城以河名凡受五小水號稱經流其東則有綽羅河布雅密河頭道河大小胡忒和恩河皆自北而南入松花江源皆出內興安嶺分支諸山

按康熙年間羅刹之役

詔遣烏拉林即吉林甯古塔兵各置造船艦於黑龍江

等處駐守其自黑龍江至甯古塔舟行水路先往

視之嗣又以遼河饋運由蒙古至伊屯門載船運至松花江黑龍江匯處令兵迎取並先後於烏拉造大船八十艘備運而副都統郎坦往覘形勢疏言從兩江會口至雅克薩城馬行可一月程舟行逆流可三月程均見平定羅利方略八旗通志諸書是時台站未設兵糧皆由吉林調發故不憚舟行迂滯至此今黑龍江分半屬俄則諾尼松花兩江與黑龍江會流之黑河口實爲要區俄人向有行船松花江之請力阻而止否則由諾尼江口至伯都訥之三岔口以東遵陸直走茂興站以達齊

齊哈爾等城三岔口以南遵陸直走蒙古草地入法庫門以達奉天皆遠不及千里之程也

額爾古訥河爲中俄兩國西界分水其上游曰克魯倫河源出蒙古喀爾喀車臣罕部入呼倫貝爾城以湖名湖水東北流溢爲額爾古訥河距城凡二百二十里始與俄羅斯國屬接又北流五百餘里會黑龍江與左岸格爾必齊河斜直上距安巴格爾必齊河三百餘里康熙年間五體書界碑分建兩河岸崖今右岸兩界仍之

按康熙二十八年中俄界碑立後外興安嶺之南

全歸省界迤東接至吉林省屬各境北邊大障天設之險無慮輕啟戎心惟俄人互市尼布楚城在安巴格爾必齊河以西與額爾古訥河一皆涉江可達邊防至爲重要自雍正五年設呼倫貝爾以西卡倫以接庫倫屬境續又增設至車臣罕界輪派官兵駐守而每歲五六月閒齊齊哈爾墨爾根黑龍江三城又各派兵將巡察邊界至安巴格爾必齊河額爾古訥河等處卓帳事訖報聞今左岸盡歸俄屬俄亦無事窺邊聞有販運牲畜越卡倫而東取徑布特哈墨爾根黑龍江各城以渡左岸

邊吏以游歷保護具列條約不復詰問矣



黑龍江述略卷二

建置

齊齊哈爾本舊站名距今城十五里站移今城名亦因之一名卜魁康熙二十八年設副都統鎮守三十二年將軍由墨爾根城奏准移此定爲黑龍江省與副都統同鎮而呼倫貝爾布特哈呼蘭墨爾根黑龍江諸城隸焉內木城建於康熙三十年外包土城周十里有餘分四門出入門各有樓光緒十三年改建內磚城如內省制

將軍衙門在內城東南

內有檔房銀庫戶兵刑工四司

將軍府在

內城西 副都統府在內城東

按東三省定制將軍衙門略如京部爲堂屬治事公所事畢各散故將軍副都統各有府居今將軍府相傳乾隆年間

高宗純皇帝將由吉林西巡建備

行宮以故規制宏敞然頂蓋草泥壓以橫木不用瓦三年則更修之猶舊制也近數十年官民興造房舍多用瓦矣將軍副都統拜發本摺必赴衙門各司文武屬員齊集卽成員亦均隨班其日行公牘則本司赴兩府呈請畫稿由管檔主事鈐印發

行副都統無印其呼倫貝爾呼蘭墨爾根黑龍江  
四城副都統皆有印不准專摺奏事擅發驛遞統  
歸將軍衙門辦理

練兵大臣公所在外城東

按東三省練兵之議勅於光緒十一年

特簡大臣會同將軍辦理就每省兵丹各選調萬  
人三年足練福州將軍穆圖善公首膺是任自十  
二年開練號黑龍江省爲齊字營每年於

盛京盛字營吉林吉字營調練後至齊字營畢事  
練兵由各城調集駐外城南舊倉一帶爲營規制

甚簡十四年將軍恭鏜公始籌買外城東民屋一區改備練兵大臣行轅號爲公所

街道廳在外城南 稅務廳在外城南

按黑龍江省不設民官獨齊齊哈爾土城內外旗民雜處一切訟獄南城尤繁於是設街道廳外城南西路由將軍副都統會派正副二員駐廳管理歲周則更先是省城街市各旗分地建屋閒有漢民賃居貿易歷一二年後屋主突來盡驅屋中人出搜索一空謂之洗街道光初年有漢軍崔公爲本旗鉅族官山西久與西商熟習言於將軍嚴禁

之並招西商二十四家力爲保護遂有二十四牌之名日繼月增市聲大起一切差徭均歸二十四牌承辦遇有新來民戶亦歸牌長保予安居以故街道廳員比州縣牧令權勢既重陋規亦多每奉委檄輒相聚稱賀云稅務廳則在外城南東路亦由將軍副都統派員辦理歲周則更凡牲畜雜貨按則抽稅年終報明戶部歸於坐支又有車稅人稅名目不知所起每車每人到城納稅給票始准往來失票則加罰輕重不等光緒十三年將軍恭鐸公嚴示禁革別設稽查處以詰姦宄而黑龍江

城人稅尤重十五年副都統祿彭亦禁革焉他城無之

滿官學在內城東 漢官學在內城西

按黑龍江省建學始於康熙三十四年將軍薩布素公奏准在墨爾根兩翼各立一學設助教官選新滿洲及錫伯索倫達呼爾每佐領下幼童一名教習書藝嗣是齊齊哈爾呼蘭墨爾根黑龍江四城均設滿學官一員有同額缺凡八旗子弟願入學者由各旗協領保送習清文騎射日不過一二時爲率多至百有餘人光緒七年將軍定安公始

議立漢官學捐廉爲倡至九年將軍文緒公成之  
學舍宏闊視滿官學爲勝立文藝經義說約啓蒙  
四科各延一師分科訓課而別設漢教習一員考  
察其成由

盛京舉貢班考取教習者選充衣廩章程均照京  
旗官學辦理在本省稅課項內開銷三年期滿如  
有成效由將軍具考送部錄用其一切課費集捐  
五千金發商生息以供支給並備十三經注疏廿  
四史四書文資治通鑒諸書存於學舍奏明立案  
舊軍器庫在內城東 新軍器庫在內城北

按康熙年間羅刹之役移

盛京紅衣礮位於雅克薩城攻之有神威大將軍  
神威將軍龍礮諸名見八旗通志郎坦傳今舊庫  
存者神威無敵大將軍礮四位神威將軍礮十二  
位龍礮五位子母礮二十一位神天礮一位是也  
其烏鎗拾鎗腰刀長矛諸器甚多例操或取用之  
餘存不動新庫設於光緒六年興辦練軍始置外  
洋軍火亦有出神機營北洋軍械所領出者各城  
歲操分別領用以時增加而無定數均由將軍衙  
門兵司經理



舊公備倉一在外城南一在內城西 新公備倉在內城北

按康熙年開羅剎之役黑龍江省曠地少耕由

盛京吉林兩省運糧餉軍其後移戶開屯大興官莊始有公備倉之設凡齊齊哈爾呼蘭墨爾根黑龍江四城通設倉房三百九十七所齊齊哈爾存糧十三萬石名廣積倉呼蘭存糧十萬石名恆積倉墨爾根存糧九萬石名通積倉黑龍江存糧十三萬石名永積倉皆逐年屯戶按丁交存號爲定額嘉慶年開以連歲告災接濟各城旗民旋遇

恩詔豁免歸還道光八年將軍蘇公奏稱倉存十  
不及一請定期十年齊齊哈爾城補存六千石墨  
爾根城黑龍江城各補存一千五百石在呼蘭城  
倉勻濟六成采買四成足額而止其時呼蘭屯墾  
日眾糧產益賤而官舟水運由松花江至諾尼江  
起卸甚便咸豐六年將軍奕山公奏稱接濟告匱  
復行水運足額而止同治二年將軍特普欽公奏  
稱呼蘭糧運不宜徑停請歲運齊齊哈爾三千五  
百石墨爾根一千八百石永爲定額今仍之凡倉  
糧出納倉官專司四城各額缺一員無衙署今省

城舊倉朽壞在外城者爲練兵大臣就立齊營在  
內城者存屋亦尠於是別建新倉視舊倉規制略  
簡焉

文昌廟在外城西 武帝廟在外城西 先農壇在  
外城東 龍王廟在外城西江岸 昭忠祠在外城  
西

按黑龍江省壇廟之制視內省簡略其春秋載在  
祀典歸將軍副都統主祭者僅五廟卽內城東有  
文廟亦屬私建以無文武額學故也外城閒有佛  
廟無僧道住持或各旗建爲公所賃作旅廬其各

城廟多有不同祀費皆由兵餉餘款支銷報部黑龍江省本以武功立名開國而還忠義林立至咸豐同治之間出征內省者四十四次其以忠勳建節如都興阿多隆阿穆圖善善慶諸公均奉本籍建祠

恩旨而例入昭忠祠附祀者尤指不勝僂齊齊哈爾舊祠規制甚隘均未之及官冊世職食俸者千有餘員初代名字大半無攷可歎也諸祠而外有吉林船廠河神祀費例由每年夏季水師官赴廠修船時供祀

監獄在內城西

按黑龍江刑獄之繁由於民墾興後然較內省一郡猶爲清減凡徒流以上諸犯各城訊驗既定咨解將軍衙門由理刑員外郎覆核取供咨明刑部辦理大率漢民居多旗丁爲少盜犯居多他案爲少亦有宗室太監重罪免死發遣來此者別予圈

禁

呼倫貝爾城居呼倫貝爾兩湖之間因以爲名一名海蘭兒故遼上京臨潢府地在齊齊哈爾西北西南接蒙古喀爾喀車臣罕界西北接俄羅斯國屬界雍正五年

設卡倫後派兵駐守賞

特遣京旗副都統等官出鎮三年一更乾隆八年額設副都統銜總管一員光緒六年改設副都統一員與墨爾根等城一例副都統所駐無城有武帝廟昭忠祠欽賞名號壽甯延喜光遠廣慧四寺均載

祀典有軍器庫有公備倉有台十七所有卡倫四十三所

按呼倫貝爾本游牧部落有索倫有巴爾虎有厄魯特各設總管等官分轄而總理於副都統地無漢民亦不通漢字文書往來皆以清文向爲邊防

要區設卡倫以重巡守立墩台以速郵傳視各城  
部署加嚴泊中俄分江而後職任亦稍輕矣

布特哈本打牲部落總稱城名因之康熙三十年初設  
索倫總管達呼爾總管謂之頭目復設副都統銜總管  
一員總轄兩部今仍舊制在齊齊哈爾西北三百餘里  
視各城最近總管所駐傍伊泊河西岸無城有昭忠祠  
有軍器庫有卡倫五所

按索倫一部傳爲遼太祖之裔爲黑龍江土著最  
久

國初由黑龍江城境徙諾尼江濱隨處占籍而呼

倫貝爾布特哈爾兩城爲多達呼爾部則布特哈爾  
齊齊哈爾墨爾根黑龍江三城亦多有之兩部打  
牲所至直至呼蘭青黑二山別部不能爭也其地  
河山紛歧向無官莊墾田亦無漢民雜處與呼倫  
貝爾同歲於五月間赴齊齊哈爾納貂貢餘則市  
易他貨以歸然世代出將號稱貴種咸豐同治間  
內省寇亂以馬隊甲兵積功至將軍都統佩

欽差大臣關防者多出此兩部云

呼蘭城以河爲名在齊齊哈爾東南毗連吉林省屬各  
界雍正十二年設城守尉一員管理鎮兵旗屯各事光



緒元年設呼蘭理事廳同知一員駐巴彥蘇蘇四年改建三營營制裁城守尉缺改設副都統一員十一年設綏化廳理事通判一員駐北團林子又設呼蘭城分防經歷一員餘慶街分防經歷一員與呼蘭廳均歸副都統節制副都統治所號中路同知治所號南路通判治所號北路名爲呼蘭三城然皆無城呼蘭城有文昌廟武帝廟先農壇龍王廟昭忠祠有滿官學有軍器庫有公備倉有台八所有卡倫四所

按呼蘭轄境四周一千五百餘里距邊較遠號爲腹地與吉林省屬境僅隔松花一江東面多山餘

皆平原極望土脈膏腴長河支港足資灌溉咸豐同治之間民屯大起直隸山東游民流徙關外者趨之如鶩獄訟因以日滋僅恃旗營長官不足爲治而理事文員陸續增設勢固非得已也初將軍特普欽公奏設呼蘭廳理事同知略曰查呼蘭所屬蒙古爾山等處閒地招墾以來煙戶增多雖皆殷實良民寓地謀生自圖永業而往來商販游手隨之遂不免良莠閒雜戶婚田土以及命盜案件亦以日繁呼蘭額設城守尉一員專司旗務兼理官莊所駐之處距開墾地面不惟鞭長莫及且於

漢文法律均非所習自應增設有司官員以資治  
理請援吉林省屬伯都訥成案設呼蘭廳理事同  
知一員管理賦課刑名及旗民交涉事件並設管  
獄巡檢一員兼司捕務在巴彥蘇蘇建爲治所所  
有該處山林河道伐木捕魚及渡口船隻均應設  
立界限分別稽查彈壓酌徵稅課以專責成其印  
信鈐記庫倉監獄俸廉工食均核照成案辦理於  
地租項下支銷云云將軍豐紳公奏設呼蘭副都  
統略曰查呼蘭暨巴彥蘇蘇北圍林子三處相隔  
各有二百餘里東南毗連吉林省屬三姓阿勒楚

喀等城西北距省城一千餘里開墾日多民繁事  
雜擬請變通營制以資鎮撫將呼蘭原設城守尉  
一員改爲副都統節制三營官兵暨呼蘭廳同知  
以重事權中路呼蘭設協領一員並佐領以下官  
合舊額設正兵六百一十二名駐之南路巴彥蘇  
蘇設協領一員並佐領以下官合舊額設副甲通  
爲正兵二百八十四名駐之北路北團林子設委  
協領一員並佐領以下官移舊駐巴彥蘇蘇正兵  
二百名駐之均分旗編定勤加操演其俸餉均於  
地租項下照章支銷按市錢二千五百文作銀一

兩爲定云云將軍文緒公奏設綏化廳理事通判  
略曰查呼蘭形勢副都統駐城在西同知駐城在  
南北團林子旗營在北餘慶街在東自民墾大興  
而後五方雜處最易藏奸非按計里分設有司官  
員聯絡肆應不足以資治理所有額設同知駐於  
巴彥蘇蘇實有萬難兼顧之勢擬請在北團林子  
增設綏化廳理事通判一員並管獄巡檢一員呼  
蘭城專設分防經歷一員歸同知管轄餘慶街專  
設分防經歷一員歸通判管轄所有呼蘭廳同知  
經徵地畝十二段與綏化廳通判各分六段卽以

地段戶籍各爲管轄界限其每年徵收地租仍歸副都統督催呼蘭城經歷餘慶街經歷管理緝捕彈壓地方遇有案件詳送本管廳官審理統歸將軍衙門理刑員外郎勘定其餘一應經制事宜均照呼蘭廳成案辦理云云

詔悉如所請行呼蘭廳之初設也衙署監獄粗具規模光緒五年馬賊大擾遂有焚署劫獄之事後賃民舍爲治不加興修綏化廳續設亦復同之三城相望糧產富饒商賈因之麇集漢民居戶不下十有餘萬尤以呼蘭廳城爲最廳官雖號有司而

旗營武員積勢久重遇有訟情強則一力把持弱則覲顏居閒不能不依違從事兼之官由部選而來率多部屬供事資格既深無聊就外六年俸滿別無升途仍須赴部另選苟有出眾之材亦必不投身荒漠吏治不飭蓋由於此墾民不安其居轉徙他遷往往而有然地沃工省此去彼來東荒西闢全省號爲精華區藪固不虛也

墨爾根城以河爲名在齊齊哈爾東北康熙二十四年征羅刹於雅克薩城築城設兵置副都統一員會同將軍駐防並設驛站三十八年將軍移駐齊齊哈爾留副

都統專駐有文昌廟武帝廟先農壇昭忠祠有滿官學  
有軍器庫有公備倉有站六所北路站官駐此有卡倫  
九所

按平定羅刹方略載墨爾根築城在康熙二十四

年九月移愛琿

卽黑龍江故城

將軍副都統駐之其時將

軍爲薩布素公副都統爲侍郎溫岱給事中雅齊

諾二公自係墨爾根黑龍江兩城並設方氏式濟

龍沙紀略則謂康熙三十二年將軍由愛琿移駐

墨爾根改駐副都統愛琿三十八年將軍由墨爾

根移駐齊齊哈爾增設墨爾根副都統恐是誤矣



墨爾根城境雖係叢山而傍諾尼江沿水土沃饒屯地之腴稍遜呼蘭猶駕諸城而上城以木柵外有土城包之居民無多然中俄兩界通衢游食往來日夕不絕近邊扼要亦黑龍江城之亞

國初與齊齊哈爾黑龍江三城並稱設暫通驛亦差相先後今諸城絡繹增設而此城視同腹地已黑龍江城一名愛琿在齊齊哈爾東北康熙二十三年征羅刹雅克薩城始於江左愛琿建城設兵置黑龍江將軍副都統官二十四年將軍移墨爾根城留副都統專駐咸豐八年副都統移駐江右今城有文昌廟武帝

廟先農壇昭忠祠有滿官學有軍器庫有公備倉有站  
六所有卡倫四十七所

按康熙二十八年中俄定立界碑而後黑龍江省  
全境實以愛琿爲適中要區墨爾根城次之自將  
軍薩布素公移齊齊哈爾城北至俄邊幾三千里  
僅一副都統官控制其間承平既久厝火積薪常  
事者漫不爲意咸豐八年分江爲界將軍奕山公  
奏報以江左空曠無人爲詞並不聲明四至里數  
雖屬倉皇定計意圖粉飾亦實由地勢遼闊夙未  
究心假使近在墨爾根城聞見稍切固未便輕於

畫諾貽誤至此薩布素公號爲名宦雅克薩之役躬與其事其開山河扼塞閱歷有年而竟一再遷徙絕無後慮殊令低徊往事者爲之躊躇而四顧也今城在內興安嶺外百五十里臨江而治別無扼要之所西起額爾古訥河東訖黑河口沿江岸二千餘里在在與鄰敵相望輪舶上下熟視而無如何卡倫雖密徒飾外觀而已城西七十里曰大黑河屯爲中俄通商口岸設邊界官一員由副都統歲一更委以司其事光緒十三年將軍恭鏗公以交涉事件繙譯綦重奏請由總理各國事務衙

門派出俄文學生主事賡善會同邊界官辦理

興安城居內興安嶺上因以爲名在齊齊哈爾東北西至額爾古訥河與呼倫貝爾接界東至黑河口與吉林省屬接界光緒八年設副都統銜總管一員始建城立署於太平灣有武帝廟有軍器庫有公備倉有卡倫七所

按興安一城介墨爾根黑龍江兩城之間南北轄境甚仄東西則橫跨全嶺至有千六百里層峯疊嶂環以巨川中俄分江而後以形勢論視黑龍江城尤爲重要初土著俄倫春部落分畢凌阿雅法

罕兩種其雅法罕在黑龍江以南精奇里江以北射獵打牲歸布特哈總管派員鈐轄號稱諳達同治十年將軍特普欽公奏收於內興安嶺內外分爲五路以備調用光緒元年將軍豐紳公奏挑鎗隊五百人每歲三月閒調集內興安嶺旺山一帶操演四十日犒賞布疋銀兩遣歸六年將軍定安公奏增挑鎗隊五百人合計千人每歲由將軍特派協領一員會同布特哈總管屆期查操八年將軍文緒公奏設今城與墨爾根黑龍江兩城相爲犄角俄倫春人向以游獵爲生排鎗每發輒中趨

悍過人同治初年吉林省屬馬賊猖獗將軍富明  
阿公奏調五百人前往一戰而定俄人亦頗畏之  
然代習山居耐寒惡熱時以出痘爲懼性頗愚一  
飽無求言語亦不易通例操之外往往伏而不出  
建城以後歲餉積存幾無人領若倚以備邊化導  
馴習歲月殆難預計尤未可以尋常文符檄之也  
太平灣雖爲五路適中之地而城署均處窪下工  
費萬金歲未踰紀已坍塌不可居總管遂寓於喀  
勒塔爾奇站有美意無良法不能不爲始事者惜  
焉將軍文緒公奏設興安城總管略曰查俄倫春

一帶牲丁久居山內二百年來未濡教化幾同野  
人向歸布特哈總管轄治所捕貂皮輒爲諳達諸  
人以微物易去肆意欺凌不啻奴畜在當時山深  
地闊尙不爲苦近因江左畫歸俄界僅有江右山  
場捕獵愈稀實屬不敷餬口且有逃歸俄境藉以  
資生者前任將軍挑練千名犒賞布銀專歸教管  
略寓收撫之意而明歸諳達教管則權勢益重而  
受制益苦浸成寇仇之勢誠恐激生事端滋起邊  
釁且該牲丁附近黑龍江城多通漢語亦頗有因  
捕獵日艱講習農事者臣已訪聞明確籌計久遠

非編旗設官列城置戍不可該牲丁鎗法極準人亦勇鷙性與索倫相近同爲

國家赤子本無貴賤之分及時收輯足期強兵固邊之效臣曾飭派查操協領會同布特哈總管入山宣布

皇恩該牲丁感激流涕願卽歸伍當差以免諳達欺凌擬請就原挑千名分設佐領管轄月給餉銀一兩歲貢貂皮一張設副都統銜總管一員總理其事由齊齊哈爾城滿洲協領中揀補至應設副管以下各官均照布特哈城章程辦理云云



詔均如所請行尋設城署卡撥一應經制事宜與諸城略等傳聞布特哈諮達管轄俄倫春牲丁由來已久所貢貂皮大半出於搜括自裁撤諮達名目且嚴禁入山滋擾啣恨頗深未及期年遂有京控巨案將軍文緒公卒以去職云

黑龍江省台站分南北西三路南路起吉林省屬伯都訥對江茂興站四十五里至烏蘭諾爾五十五里至古魯六十七里至他拉哈七十五里至多耐七十五里至溫托河七十五里至特木得黑五十五里至齊齊哈爾六十里至塔哈爾七十五里至甯年凡十站又東南路

起茂興站四十二里至波爾吉哈台八十里至察布奇  
爾六十里至鄂多爾圖四十五里至布拉克七十五里  
至察哈和碩七十五里至呼蘭城九十里至新安六十  
里至呼蘭廳城凡八台均歸南路站官管轄駐齊齊哈  
爾城其額設站丁三百四十二名車四十二乘馬三百  
二十七匹牛三百三十八隻北路起甯年站八十五里  
至拉哈六十里至博爾多四十三里至喀木尼喀四十  
二里至依拉喀七十里至墨爾根城七十六里至霍羅  
勒七十六里至喀勒塔爾奇八十五里至庫木爾三十  
三里至額爾爾七十八里至黑龍江二十二里至黑龍

江城凡十站均歸北路站官管轄駐墨爾根城共額設  
站丁二百名車二十九乘馬二百匹牛二百七十隻西  
路起齊齊哈爾站五十里至七家四十五里至甘井子  
五十五里至那奇希四十三里至木爾棍楚五十里至  
赫尼昂河三十里至河尼三十里至西巴爾哈哩四十  
里至巴林五十里至嘎爾乾哈達四十里至雅勒伯霍  
托五十里至依爾克特五十里至庫爾格特依五十里  
至們都克依六十里至雅克薩五十里至喀拉霍碩六  
十五里至札拉木太五十二里至哈克臥莫六十里至  
呼倫貝爾城凡十七台歸呼倫貝爾副都統管轄其額

設站丁二百名車二十九乘馬二百匹牛三百隻

按康熙二十三年將軍薩布素公征羅刹雅克薩城

命以郎中包奇所丈量吉林至愛琿

即今黑龍江故城

一千三百四十里置十九驛此爲黑龍江省創設台站之始今南北兩路站官管轄者是也其西路各台疑在雍正五年建立卡倫時同設蓋邊防正重呼倫貝爾一路置郵傳命實關軍政之大然無明文可考站丁授有官田力耕當差餘丁簽名幫貼自咸豐軍興而後繼以齊營本省兩起練軍餉械

絡繹差徭之重較道光以前數倍餘丁一人簽名無不蕩產破家者同治十二年恭上

皇太后徽號恩詔內有撫卹驛站一條經將軍某公奏准按丁月給京錢一千而新安一台由呼蘭城屯丁十五戶撥充光緒二年復經將軍豐紳公奏准按丁月給京錢二千傳聞站丁始於康熙係逆藩吳三桂屬下免死發遣例不准應試服官惟所授官田雖有定則而荒漠散漫無人勾稽頗有勤力開拓以致富饒者然管轄各官視為利藪且額缺四年一更新舊交乘每多魚肉視之議者以

爲吉江兩省站丁不下數萬積鬱累世勢亦可虞  
似宜推

恩豁籍以示寬大其閒不無才傑拔而用之可隱  
收實邊之效也

黑龍江省各城額設防邊卡倫在齊齊哈爾城境者曰  
莽熊曰綽羅曰博爾齊勒凡三又和倫部曰拉哈鄂佛  
羅曰溫德亨曰蘇克台蘇蘇凡三在呼倫貝爾城境者  
曰珠爾特依曰錫伯爾布拉克曰巴延珠爾克曰烏雨  
勒赫齊曰巴雅斯呼明溫都爾曰巴圖魯和碩曰庫克  
多博曰額爾德尼托勒輝曰孟克錫哩曰薩巴噶圖曰

蘇克特依曰察罕鄂拉凡十二曰庫勒都爾河曰特爾  
默勒津河曰特尼河曰崇古林谷口曰墨爾根河曰阿  
爾噶圖谷口曰喀喇鄂索谷口曰薩奇勒圖山曰開拉  
哩阿翁昆曰溫都爾額埒蘇曰烏蘭昂阿曰布拉克圖  
舍哩曰摩該圖舍哩曰托勒輝圖舍哩曰鄂勒圖舍哩  
凡十五曰喀卜齊哈圖曰阿拉勒圖曰札拉曰布爾克  
圖曰和爾哈圖曰哈薩圖曰音辰曰阿嚕布拉克曰穆  
敦哈薩圖曰札穆呼都克曰貝爾布隆德爾蘇曰鄂爾  
遜河烏蘭昂阿曰額布都克喀曰拉們罕布爾都哩曰  
烏默克依布拉克曰納爾蘇凡十六在布特哈城境者

曰喀爾開圖曰烏爾布齊曰吉爾吉哈諾爾曰溫托琿  
曰喀喇山凡五在呼蘭城境者曰珊延富勒哈曰綽羅  
河口曰諾敏河曰布勒噶哩凡四在墨爾根城境者曰  
諾敏河巴延和羅曰甘河商和哈達凡二又和倫部曰  
塞楞額山曰喀穆尼峯凡二曰庫爾河曰諾敏河曰  
喀布奇勒峯曰綏楞額山曰布爾札木凡五在黑龍江  
城境者曰巴拉畢喇昂阿曰伊瑪畢喇昂阿曰精奇里  
河曰烏魯蘇穆丹曰科納爾曰喀塔奇曰庫默勒曰額  
葉爾凡八又和倫部曰紐勒們河曰遜河口曰訥墨爾  
河源凡三曰畢喇拉河口曰黑龍混同兩江會口凡二



在興安城境者曰庫瑪爾曰貝爾河曰里河曰托河  
曰多普庫爾河凡五皆雍正五年以後陸續增設輪派  
官兵巡守由各城副都統總管等分轄咸豐八年中俄  
分江爲界黑龍江城境如伊瑪畢喇昂阿精奇里河烏  
魯蘇穆丹紐勒們河黑龍混同兩江會口五卡倫歸左  
岸俄境而右岸境東增改卡倫曰大黑河屯曰尼堪托  
哩勒哈達屯曰霍尼音霍爾哈屯曰倫布的音屯曰豁  
爾莫勒津屯曰莫奇曰松花黑龍兩江匯流黑河口凡  
八境西增改卡倫曰札克達霍洛曰奇拉曰瑚瑪爾凡  
三光緒十二年以防護漠河金廠由大黑河屯奇拉瑚

瑪爾各卡倫沿江而西增設卡倫曰西爾根曰土哈達  
曰岔哈彥曰安干河曰鄂西們曰依西肯曰安羅曰西  
勒爾奇曰愷庫康曰平果曰阿木爾曰巴勒嘎哩曰烏  
蘇里河曰漠河曰太斐音哈達曰訥欽哈達曰博爾郭  
哈達曰額爾古訥河曰額勒和哈達曰依木河曰溫河  
曰牛爾河曰莫力勒柯凡二十三以接呼倫貝爾城境  
珠爾特依卡倫而止又增設東南卡倫曰車勒山曰遜  
河曰關爾斐音河口曰吉普遜河曰提音河凡五均由  
黑龍江城副都統與興安城總管分調官兵輪班巡守  
悉如舊制而派布特哈副管一員駐漠河卡倫爲總卡

按中俄接界之區自西徂東不啻萬里雍正五年郡王策凌等會同俄羅斯國使臣薩瓦勘定疆界設卡倫五十九所其極東十二卡倫歸黑龍江將軍統轄卽呼倫貝爾城境珠爾特依等卡倫是也乾隆二十七年復於城境東北設庫勒都爾河等十五卡倫西南設喀卜齊哈圖等十六卡倫見盛京通志諸書其餘各城所設卡倫年月無考今以地勢按之黑龍江城境而外或防滿蒙逃人或防盜采參珠隨時增設不盡關乎邊防亦不盡在

勘界以後承平日久詢之官役土人多瞠目不知所在而中俄分江以還並呼倫貝爾城境各卡倫亦幾視爲具文齊齊哈爾城境諸卡倫見文報者僅一莽鼯蓋歷年遣戍犯員充當苦差多指此地爲詞故也黑龍江城邊要之衝新設卡倫極爲周密然皆在城境以西其東下千里新舊卡倫不及十所耳目難周邊言控制識者蓋隱憂之初卡倫之設派官一員兵九名十名十五名不等駐於卡房按日巡察一周或一月一更或三月一更遇有越境逃盜各事通報緝治其傍江河水程者冰泮

則往冰結則撤如齊齊哈爾城境所轄和倫部三  
卡倫是已卡倫猶漢時邊塞亭障

國語謂之喀倫台則瞭望烽火亦遞文報猶內省  
大道煙墩云

黑龍江省電報設於光緒十三年由吉林省屬伯都訥  
城分綫過松花江而北至齊齊哈爾城爲一局又北至  
墨爾根城爲一局又北至黑龍江城爲一局又北至大  
黑河屯而止而齊齊哈爾城局總理其事局設將軍府  
前

按電報之設由

欽差練兵大臣穆圖善公奏准以通邊防消息而  
北洋大臣李公鴻章籌款派員經理其事以黑龍  
江省站道計之凡千有四百餘里中徑取捷閒借  
蒙古郭爾羅斯部屬境一應事宜悉依內省定章  
凡用工費十萬金有奇先是履勸電路委員啟陳  
籌辦情形略曰查江省電工創始旣難而善後尤  
難自毗連吉省松花江沿起至大黑河屯止官路  
幾及千五百里城池台站而外村落寥寥卽省會  
之區不及內省中等市鎮他城則官署民居通計  
不過十有餘家全省放款專賴協濟別無閒款融

銷較之吉省情形虛弱特甚今擬於齊齊哈爾墨爾根黑龍江三城各設一局派員經理而起伯都訥城訖大黑河屯各設一報房該管綫路各歸各局分別巡修仍倣照吉省責成台站員役兼任統計歲費七千金萬不能減必須請定專款免有貽誤電竿尺寸已往俄界測看每竿出土不過一丈五尺過高則虞風折其寬坦地面牲畜散處冬日野燒夏日蚊虻易至驚傷奔觸則先於電竿四面加培新土以固其根尙屬易辦惟苦寒極邊內省委員報生恐難耐久似宜就局設學招募本地秀

民習英文英語以廣傳授庶爲一勞永逸之計云  
云電局既成商報亦頗通行而經費供支尙屬不  
給識者以爲邊要以黑龍江城爲重地脈以呼蘭  
三城爲腴江省電路既屬吉省分綫則由三姓西  
通呼蘭以抵齊齊哈爾路雖遠於伯都訥城而官  
商公私一切取便開辦之初需費較多歷久而後  
享利實大惜始事之人未經通審全省地勢商情  
捨此而就彼也